



# QUÆSTIO MEDICA,

QUOD LIBETARIIS DISPUTATIONIBUS  
manè discutienda, in Scholæ Medicorum, die Jovis  
ultimâ Decembris.



M. LUDOVICO LEMERY, Doctore  
Medico, Præfide.

*An qui morbos neglectâ Chimie cognitione oppugnant,  
verè Empirici?*

## I.

**A** PRIMIS medicinæ incunabulis maximæ fuerunt inter medicos dissensiones, & controversiæ; Et in eundem licet scopum omnes contenderent, presentem conservandi sanitatem, absentem restituendi, diversis tamen viis contenderunt. Qui se *ἐμπειρικοὺς* ab experientiâ nominabant, inanem ac supervacuum esse abditarum, & obscurarum causarum cognitionem asserabant; Quoniam naturam nulli præterquam ignavo inviam, aut invidam incomprehensibilem esse falsò autumarent. Hinc factum est ut relictâ ratione ducem unam experientiam fuerint secuti. Methodici contrariam omninò viam ingressi neglectâ experientiâ in futilibus quæstiunculis tempus omne consumpserunt; nec ab opere medici, sed à dicendo logodadali facti, confictam confabulandi magis quam medendi artem fecerunt, innumeris disquisitionibus, & argutiolis medicinam deturparunt. Utriusque sectæ fautores inventis unice acquieverunt, non arti sed artificibus studuerunt, non rerum naturam investigarunt, sed authorum opiniones; & quominus quidquam invenirent, mutarent, assererent, defererent, religioni duxerunt. Hinc socordiâ veterno scholæ facile infectæ sunt, cum quilibet assentiri, quam indagare mallet; Hinc in arte medendi &

medentum animis turpis ignorantiae offusa caligo. Dogmatici glorioso medici titulo soli decorandi rationem simul cum experientia conjunxerunt, corporum naturam scrutati sunt, causarum differentias expenderunt, & curationem per indicationes instituerunt. Haec secta omnium sane praestantissima, novis ac praeclaris in dies inventis illustrior evasit. Hanc amplexari cuicunque animus est, Empiricorumque fugere catervam, is genuinas morbi causas inveniat, accuratas remediorum vires ac potestates investiget; in quo postremo cardine olim sudatum parum, scitum fere nihil, multum promissum, plurimum neglectum, expectatum dudum, & erratum ubique à veteribus fuit.

## I I.

**H**ALLUCINATI sunt graviter qui naturam, ipsiusque operationes quaslibet ad calculum quatuor elementorum peripatheticorum, qualitatum, & complexionum in mixtione resultantium revocarunt; Cumque ex imparitate, elementorumque duello omnes omnino infirmitates, & fomenta primigenia nostrae mortalitatis descendere existimarunt. Quid juvat vana haec figmenta nosse? Quae incertas & obscuras indicationes in curandis morbis exponere, atque per inanem quaestionum exercitationem imbecillos multorum animos à recta praxeos ratione abducere solummodo apta nata sunt. Mirum tamen quam superstitiose ejusmodi nugas antiquitatis veneratione colant qui paratis tantum incubant, & à populari nutu seu vilia mancipia pendent; vixque extra tritam semitam pedem ponere audent, avertis in erroribus jamque inveteratis, & ad nepotes, prohi dolor, transitis consensescere amant, & immori. Naturam quotquot antecedentium adiere non excluderunt adituros, sed multum ex illa operis reliquerunt & sequentibus; proinde nec domini illi sunt, sed commilitones quos quemadmodum prorsus deferere temerarii, ita & religiose consecrari imbecilli profecto est animi; duces quoque non qui imperent, sed praecant, nec nisi criticis audiendi auribus, etiam cum docuerint ediscenda; potuerunt enim illi & necessaria reperire, nisi superflua quaesivissent; & vestigare utilia, si supersedissent inutilibus. Naturae ergo cognitioni totum se dedere medicus debet, experimentisque sedulo & coacervatim factis, iisque è naturalis

philosophiæ penu depromptis morborum causas, remedium facul-  
tates non levibus omnino conjecturis adumbrare, sed me-  
chanicâ veritate illustrare. Morbus fere omnis à fluidis; horum  
varia principia diligenter & accurate perspicenda; ex quo-  
rum magnitudine, figurâ, sibi invicem connexione, & motu  
diversis pendent vel sanitas, vel morbus. Eâdem philosophandi  
ratione medicamentorum vires à propriâ etiam partium essen-  
tialium structurâ, ac motu dependentes propius inspiciendæ; quæ  
quilibet neglexerit, indicationes è morbis, morborumque cau-  
sis elicere, & indicationibus satisfacere nequaquam poterit;  
medicinamque empiricorum more exercebit.

### I I I.

**C**HIMIA duplex, rudis una & barbara, pure experimen-  
talis, certo quorundam experimentorum numero fulta,  
solâque artificis ad opus chemicum facti manu indigens, qualis  
olim à veteribus exercebatur. Altera rationalis, mechanices, &  
veræ phisices regulis subjecta, cujus ope nova quotidie cum suc-  
cessu experimenta tentantur maxime necessaria, quibus mirabilis  
hæc ars de novo in dies illustratur. Hæc omnium medicinæ par-  
tium utilissima est medenti, quâ sublatâ quem in alis progressum  
faciat? Quæ in cæteris medicinæ partibus occurrunt contorta  
atque difficilia enodat & explicat, iisque lumen affert maximum.  
Quid proderit medico partium solidarum situm structuramque  
exteriorem in cadavere humano cognovisse? Ni chimiæ auxi-  
lio partium fluidarum structuram interiorem, fermentationes di-  
versas, operandi modos perspectos habuerit, causas nimirum  
præcipuas vitæ, atque functionum partium solidarum. Quid Bo-  
tanicum juvabit extremas mundi plagas percurrisse, plantas ex-  
traneas invenisse, nomina non ignorasse. Ni chemicâ arte harum  
potestates, atque facultates clarius evolvantur, & explicentur.  
Macrocosmos, & microcosmos vera sunt & naturalia, ut vocant,  
laboratoria in quibus eadem quæ in arte facta peraguntur ope-  
rationes; circulationes videlicet, sublimationes, præcipitationes,  
filtrationes, distillationes, coagulationes, dissolutiones, fermenta-  
tiones & cætera id genus. Chimia corpora quæcumque qua-  
tuor constare principiis docet non unicâ eorum qui hæc acute  
invenerunt phantasiâ, quod de aliis philosophorum principiis  
plerumque affirmari potest, sed per se & naturâ suâ existenti.

bus ; quo pacto hæc in se invicem agant , quæve unumquodque motûs determinatione , ac figurâ polleat , declarat , operationibusque iis omnino similibus quæ in nobis perficiuntur , diversos partium essentialium motus patefacit. Magisterii sulphuris operatio nitidam ac distinctam chilificationis , & sanguificationis ideam subministrat ; non secus enim ac sulphur cum sale alkalino permixtum , quo rarefactum & attenuatum pluribus donatur superficiebus , è flavo album , & ampliore partium dissolutione rubrum evadit ; sic etiam alimenta colorem album , & tandem ulteriore fermentatione rubrum adipiscuntur. Spiritus tartari ab oleo nigro per chartam emporeticam separatio humorum secretionem per glandulas sibi partium figurâ , ac dispositione convenientes satis denotat ; quæ tandem in nobis fiunt operationes , quæ ad perfectam chemicarum similitudinem non accedant ? Ex his legitimè vel malè in nobis peractis , pendet vel morbus vel sanitas. Ad has itaque seriò attendat medicus ; sique in corpore humano non belle perficiantur , emendet & corrigat , ut chemicus in laboratorio. Nec absimili ratione quæ chemicus , quid operationi suæ offecerit , facili negotio agnoscit , medicus certis ac indubitatis rationalis chimix principis instructus , morborum causas , medicamentorumque vires faciliè detegit ; novaque præstantissimæ hujusce artis beneficio indagabit remedia , quibus morbi olim incurabiles tutò ac jucunde felicissimis hisce temporibus sanabuntur. Hinc patet chimix necessitas ; quam si quis postea acerbius & contumeliosius invehatur , audiam ut agrum convicia facientem , cui vel phrenesis vel acuta febris meliorem sui partem abstulit , nec irascar , sed miserebor.

## I V.

**S**ALES cultri totidem , obvia quæque incidere & attenuare apti , particulis coalescunt rigidis , longis & acutis ; pro diversâ cuspidum figurâ , magnitudine , ac motu diversas edunt actiones ; alias videlicet sal alkalinum , alias sal acidum , alias volatile , alias fixum , alias essentialiale. Salia in aquâ dissolvuntur , & è liquore acido sese sensim sine sensu in poros matricum quarundam terrestrium impicante & insinuante conficiuntur. Sulphur substantiâ constat subtili , dulci , unctuosâ , ramosâ , facile inflammabili , salia intricare idoneâ. Aqua particulis oblongis , teretibus , flexibilibus , in omnem partem mobilibus & instar

anguillarum lubricis. Terra tandem irregulari atque crassiori partium structurâ. Basis est fundamentum & adminiculum aliorum principiorum, hæc congregat, conjungit, iisque soliditatem largitur. In statu naturali hæc ita sibi invicem cohererent largitur in fluidis, ut sulphureæ partes ramosis suis figuris aliarum unionem foveant, easque intra textum suum recondant, detineant, involvant. Sicque salia non summo cum impetu sed moderato motu concitata temperatam cruoris effervescentiam provocant, quam sequitur benignus & salutaris calor, quo primum accenso vita incipit, extincto desinit. Hæc ubi consentiens ad corporis incolumitatem partium essentialium coagmentatio à principio quodam vel externo, vel interno fuit dissoluta, tunc motibus maxime diversis exagitantur humores; vel enim eorum salia quaquaversum impetuosius commota, sulphura nimis exaltant, obices quosunque destruunt, fermentationes immodicas cient, humores nimis dissolvunt: vel crassiore compage motuque exiguo donata ramosis quibusdam particulis facile involvuntur, in quarum anfractibus quem habebant motum deperdunt, particulis rigidis sulphurum poros obstruunt, materiæ subtilis horum antea particulas insensiles continuò exagitantis, iisque fluiditatem consiliantis intromissioni obstant; hinc humorum coagulatio. Duabus ab his causis solius artis chemicæ auxilio dignoscendis morbi exoriuntur. Tribus potissimum viis medicamentorum facultatesprehenduntur. Analisi, quâ patet quibus omnia fere corpora principiis consent. Medicamentorum cum animalium humoribus, aut liquoribus aliis analogis miscellâ, quâ per comparisonem, quos in nobis parere valeant effectus, dijudicare licet. Tandemque secundariis Peripatheticorum qualitatibus, iisque præsertim quas gustus ac odoratus denotat. Sic amarum salia probat acria sulphuribus unita, attenuantia, massam sanguineam paululum dissolventia. Acidum salinas particulas, sulphurum coagulationem sæpius producentes, nimium humorum impetum sedantes. Acre sales aliquando acidos maxime commotos, aliquando alkalinos inæquali superficie inhorrescentes, partium figurâ sulphura dissolvere & attenuare aptos. Austerrum & acerbum acida quædam terræ partibus consociata, humiditates superfluas absorbere, violentos nimis liquorum mo-

tus retardare idonea. Inspidum & unctuosum particulas aquo-  
 fas, & sulphureas, salia involventes, nimiamque sanguinis ef-  
 fervescentiam temperantes. Ex odore tandem quibus donen-  
 tur medicamenta particulis, an fixis, an volatilibus facile di-  
 stinguitur. Præterea chimia quæ sint in apponendis remediis in-  
 stituendæ cautiones indicat; ubi erunt certi quidam evacuandi  
 humores purgans medicamentum, aut potius menstruum exhi-  
 bebitor, partium dispositione humori dissolvendo, & foras elimi-  
 nando conveniens; hæcque tandem prudens magistra in omni  
 laborum perfensione medenti ducem se præbebit.

## V.

**P**ER artem chemicam veteribus parum notam, Neotericis  
 evidentem, ac divulgatam, novisque continuo experimen-  
 tis confirmatam, salutaris medicinæ professio præcipue nobis in-  
 crevit. Nec nisi chimix benigno rore irrigata, si augurari fas est,  
 ad summam unquam gloriam florescet. Divinus senex, fulgen-  
 tissimum medicinæ lumen id agnoverat, nec absque chimix ipsi  
 non ignotæ auxilio morbidarum causarum notitiam assequi, ex  
 iis indicationes educere, & convenientia reperire medicamenta  
 unquam potuisset. Galenus ipse alter ab Hippocrate medicinæ  
 princeps chimiam, miramque ignis efficaciam laudibus celebra-  
 vit; & licet ipsius tempore philosophia naturalis seu chimia inter  
 paucos arcano silentio occultaretur, hujus adipiscendæ causâ  
 tamen totam perlustravit Ægyptum, ubi ars illa jam tum vi-  
 gebat; plurimaque & rara ibidem accepit pharmaca, quibus in  
 patriam redux fausto cum successu in curandis morbis usus est.  
 Idem senserunt veteres quamplurimi inter quos Mathiolus ne-  
 minem medicum absolutum esse posse asseverat, imo ne medio-  
 crem quidem qui in chimia non sit exercitatus. Quot felici hocce  
 sæculo præstantissimæ hujus artis ope inventa sunt medicamenta?  
 Quotve inveniendæ? Si quâ hætenus excolta fuit diligentia,  
 eâdem in posterum excolatur. Quanto demum nobis esse debent  
 despectui & ludibrio, qui à verâ philosophiâ & medicinæ veri-  
 tate deflectentes, velut ebrii circa luridas deitantes, & cæcitates  
 in tenebris cespitant? Si quid medicinæ progressum morari, aut  
 impedire valeat, ii sunt præsertim flagitiosi homines, qui quam  
 nec è primo quidem limine salutarunt artem chemicam, anti-  
 quissimam dominam calumniis infamare gloriantes; raro tamen,



nec nisi casu atque fortunâ morbos curant, & exhaustis crudeliter miserorum venis impune saginantur. Multa se scire jactant, imperiti licet, & velut manducato pomo vetito plane nudi, præterquam quod se ipsos apud ignaram plebem sordidâ spe lucelli extollere, & famam aliquam, Herostrato similes ex alieni nominis ruinâ aucupari didicerunt. Heu quàm à divino sene, cujus sequaces se esse gloriuntur, discrepant? Is quippe sapientissimus vir per literas Democrito ingenue fatetur se quantumvis jam senem ad artis medicæ summam non pervenisse; hosque libro 1<sup>o</sup>. de diætâ colit, atque dilaudat qui investigare conati sunt sapientis naturæ arcana opera, additque quod immeritò ullus aliquis ipsorum reprehendatur, propterea quod invenire non potuerit. Proh! Ubi majestas quâ fulgere debent medicinæ principes? Ubi decor? Ubi existimatio? Jure cum Hippocrate affirmabimus medicinam omnium esse artium nobilissimam, sed propter ignorantiam eorum qui eam male exercent, omnium esse vilissimam.

*Ergo qui neglectâ Chimie cognitione morbos oppugnant,  
verè sunt Empirici.*

Domini Doctores disputaturi.

M. Gilbertus Puyton.

M. Philippus Caron, Chirurgia Professor.

M. Andraas Enguehard, Professor Regius.

M. Andraas Cressé.

M. Ambrosius Nicolaus Chemineau, Scholæ Professor.

M. Josephus Thomasseau.

M. Armandus Josephus Collot.

M. Joannes Gelly.

M. Ludovicus Poirier.

Proponebat Parisiis EUSEBIUS ADRIANUS THUILLIER,  
Parisiensis, Baccalaureus Medicus, & Regiæ Scientiarum  
Academiæ. A. R. S. H. 1699.

---

Apud Franciscum Muguet, Regis & Facultatis Medicinæ  
Typographum.